

豫章叢書

第二四冊

皇明西江詩選卷之四

會稽韓陽選編

弋陽李奎校正

鄒緝

字仲熙號素庵吉安吉水人洪武庚辰進士仕至右春坊左庶子兼翰林侍講

望嶧山

泛舟度清濟東望鄒嶧山遙遙青霞峰明滅煙霧間
石厓上突兀峭壁高巘屹魯邦峙岱宗茲山獨相連
孤桐生其陽古刻在其巔名標史籍中事出秦漢先
至今萬代後遺跡猶見存憶昔初經過瞻望不及攀
俯仰三載餘復此開心顏靈蹤尚未泯白雲時往還

我欲登絕頂凌風散羽翰縱覽今古內曠然超人寰
卽事

月上碧天高夜涼清露重獨起推篷看風生寒波動
兩岸蘆聲急一川煙景微忽聞棹歌響驚起白鷗飛
蕭蕭岸葦黃潏潏江波白靜夜不成眠起坐看明月
數楊花

輕盈不自持厯亂隨風起朝逐上林飛暮落東流水
素質徒可憐貞心不自擬感此懷益深歎息殊未已
行路難

請君勿言苦我歌行路難世事有翻覆人心若波瀾

布衣扼奪卿相位禍讐起自盃酒間君不見昔時山
東狂匹夫讀書往往輕凡愚談笑強于唐舉相搖鞭
西入咸陽都一言啖秦王再言扼范雎黃金束帶高
堂居風雲變態生須臾君不見魏其都位漢公卿灌
夫意氣排漢廷武安本在門下列拜伏跪起呼父兄
一朝寵據津要地舊時意態甯復生賢嬰旣失勢穎
水亦不清狂呼罵坐何足驚咸陽市上殊無情行路
難行路難人生自古有如此何須局促增歎聲

題天台吳趙雙節婦卷

老姑昔年哭夫死婺居獨撫側室子孤子艱難旣長

成娶婦仍期主宗祀那知婦歸能幾時良人又復中
分離鰥寡新婦空閨裏更無五尺應門兒此心誓與
同生死不學楊花逐風起老姑白髮七十餘新婦于
今亦衰矣床前明月照地光貞心皎皎終不忘百年
姑婦死相守且看吳家雙節堂

楊學士新藏所翁畫龍

天風呼號樹欲折蒼龍躍起山石裂波濤湧雲冥
冥奮尾揚鬣如電掣一龍夭矯升天行神光異采紛
品瑩一龍當空雨下土八尺胡髯勢如怒目睛閃閃
鱗甲明一龍吹氣成玄霧信知神物非凡物變化飛

騰起恍惚誰能妙思奪天工好是當年所翁筆

白楊河

白楊河下春水碧白楊河邊多估客東風二月柳條
新却念行人千里隔岸上居人纔數家茅茨深處見
桃花小婦河邊汲新水老翁門外看雛雅桑苗未青
麥苗綠牛羊散落村墟牧行客年年任往來居人自
住楊河曲

題李陵泣別蘇武圖

漢家烟塵仍未息君牧海邊臣屈膝當時同憤死匈
奴誰料君今歸故國胡天茫茫塞草青君歸依舊漢

官榮臣身雖倚戎王貴收淚慚君後世名

河邊柳

河邊柳昔人曾種今還有千絲萬縷搖春風年年攀
折行人手行人朝暮相經過新條無柰別離何柔情
不減舊時意舞態誰憐幽思多北來南去知多少青
青只有河邊柳不見迎新送故情空使行人每回首
瞻雲軒爲鄱陽朱仲達賦

望親舍登高邱雲飛處心悠悠思親目斷親逾遠遊
子天涯猶未返晨昏供養既有違空望飛雲長在眼
年年商賈微微利得錢養親願親喜何如收拾大刀

頭綵衣膝下供甘旨

劉向墓

漢庭懷直道宗室獨稱賢
諫疏憂時切遺經與世傳
荒墳今寂寂碧草自芊芊
何事楊雄宅爭傳草太玄

送王進子周赴巴陵學

射策明時不見收
獨携書劍別神州
且將教雨分荆楚
應見文星近斗牛
泛渚定過雲夢澤
題詩須上岳陽樓
秋風遙想登臨處
却望京華憶舊遊

九日登欽天臺

高臺千尺出城頭
佳節登臨散客愁
六代江山餘勝

跡萬家樓閣倚清秋石頭鴈斷西風急鍾阜雲寒落
木稠黃菊欲開時已暮一盃未盡強相酬

桃源圖

洞口青山多白雲仙源還有避塵人往來茅屋渾忘
歲開遍桃花始識春漁父已傳今屬晉市朝誰覺久
無秦紛紛世代相遷革回首東風感慨頻

若思祭酒自謂目昏賦詩述懷因以見寄依韻
和之

厭開池沼沸羣蛙眼暗終朝更自嗟謾想容顏羞覽
鏡欲親書卷覺生花頻看墜葉疑飛鳥每望飛雲認

落霞五十未過頭已白可憐惆悵惜年華

朱彥昌

號東臯耕叟
撫州臨川人

松亭

窗戶通雲氣藤蘿補屋茅欲符丁固夢故結謫仙巢
春釀花爲酒時食葉作穀擬從風月夜共聽響生龍
桐江釣隱

富貴非吾願煙波足自娛西風雙鬢短夜月一身孤
棹樵時時鼓村醪日日沽不知江海上曾有故人無
贈道會涂志清領職歸宜黃

羽衣來自五雲端勅賜黃麻墨未乾梅福南昌成吏

隱葛洪勾漏本仙官一聲白鶴橫江夜三尺青蛇出
袖寒歸到鳳山春滿屋絳桃花發繞江干

楮被

一幅真純織不成寒波濯滌絕纖塵白雲影落茅簷
夜晴雪光涵斗帳春擁鼻想無天上夢禦寒偏濟世
間貧要知誰與同清苦窗外梅花是故人

題顏上人聽泉軒

上人洗耳聽清冷非爲官商協八音山雨震凌浮泗
磬松風戛擊斷紋琴波瀾不動禪心定脉落潛通覺
海深欲借蒲團分半榻一牕涼月夜沉沉

題桃源圖

當時秦鹿走中原天下紛紛孰可論黔首已沾新雨
露白雲猶隔舊乾坤水流花謝長三月犬吠鷄鳴自
一村我昔荆湖詢往事茫茫煙浪幾黃昏

悼鶴

仙禽羽化入冥冥空想飛魂尙在陰赤壁江寒那有
夢青城天遠杳無音忍言骨骼堪爲笛何動心情肯
劈琴愁殺山人眠蕙帳夜深誰伴野猿吟

胡敬方

名直號西澗吉安吉水人贈都察院右都御史

立秋後有懷京洛諸故舊

秋序昨夜至炎蒸尙復然青山不改色黃葉隨我前
物性固細微迺得氣之先人生宇宙間俛仰終百年
質非金石固豈得恒雕鐫朱顏亦易失皓髮無由玄
念我平生友磊落皆俊妍清狂二十載聚散如雲煙
高歌白玉堂隱約青楓巔行止固不偶所賦良由天
云何謬出凌空失高騫自慚白紛人有負青瑣賢
九霄高漠漠千里情悁悁昨尋東籬菊欲買南山田
安分乃吾事富貴甘棄捐努力事勲業諸公斯勉旃

登石材嶺偶成

驅車市廛間紛紜競馳逐勝地一登臨稍覺舒心目

前乘葛溪險後俯巽峰綠猿啼隔幽渺鳥鳴在空谷
上有千歲松茯苓日堪斲下有百尺潭蛟鼉日潛伏
聞知學仙侶誅茅向其麓求之不可得況可與論宿
擾擾塵世人何爲苦羈束願言往從之超然越流俗
蚤讀聖賢書無心志丘壑欲起振橫流翱翔上寥廓
如何中道乖塵事苦羈縛今日旅江臯明日走城郭
杖屨不容離巾屨豈能却佳晨陟幽巖俗慮俱脫畧
緣微度前嶺跼步登險嶸時秋積雨霽草樹將搖落
安得一壺酒遠與幽人酌浩歌天壤間冥棲有真樂

題澶源顏氏三節婦傳

丈夫志耿介女子才質柔苟或見操執翻令丈夫羞
元運昔紐解盜賊森戈矛屠戮盡良善奔竄靡所由
昭昭顏氏女備見婦行周其一甘自斃委身赴清流
其一斷其吭流血被滿頭最後遇俘獲怒罵聲喧啾
偉哉賢妯娌屬氣凌高秋偷生既不可義死終無尤
煌煌魯公業孤苦殊與侔如何後來士肉食尸人謀
一旦異所操忍辱甘事仇仁山聳而秀瀘水清且幽
我歌節婦詞激烈壯心憂

夜宿嶰空寺

朝從龍濟遊暮投嶰空宿山深風雨來庭戶秋容肅

解衣掛垂蘿裁詩倚脩竹寓此適幽情超然脫塵俗
清虛子

清虛子神仙客妙年出入黃金闕曾侍天壇禮玉皇
鶴氅羽衣金蕩節或隨列禦寇乘風入極中或從赤
松子吐納凌清空三花既結頂五炁仍蟠胸松柏秀
眉桃李容清虛不與流俗同吸沆瀣兮被明月幾見
蟠桃千歲紅我有紫霞想未脫塵外踪有待功成拂
衣去桃花源上期相逢

小孤山

岷嶓水自巴蜀來西江彭蠡亦壯哉眾流於此相會

合滾滾一道由天開控引百川水日夜俱朝宗萬古
君臣義江流無不同兩山相峙青壁立一柱擎天高
萬尺閣雲宿霧任往來巨浪驚濤從射激織綃祇畏
蛟魅愁燃犀預恐魚龍泣半山亭榭赤欄干仙女神
遊晝往還鸞鶴何須聞閭苑環珮謾許留塵寰我有
登高興未獲造其間絡石土花碧映水桃竹班吳公
雄筆照絕島邵庵學士同躋攀風流數老不復見遺
餘妙墨留空山遠招山之靈酌以一壺酒禹功碣石
今尙存伏波銅柱終難朽俛仰人間無盡情萬歲千
秋唯汝壽